


AVA CHO


**Gargi
Bhattacharya**

**COPYRIGHTED
MATERIAL**

আভা চো



গার্গী ভট্টাচার্য



পাপাজীকে ,

স্পিরিচুয়াল কন্যা :: গার্গী (চন্দ্রাণী)

“The way to live a happy, beautiful life
is to accept whatever comes
and not care about what does not come.”

– H.W.L. Poonja, The Truth Is.

**Papaji--Sri H. W. L. Poonja (13 October
1910 or later in Punjab, British India to**

6 September 1997 Lucknow,India)

আভা চো

আভা চো এক চৈনিক মহিলার নাম । আসল নাম হয়ত কিছু একটা ছিলো কিন্তু বিদেশে এসে সেই নাম বদলে ফেলেছে । এখন এখানে লোকে ওকে মেমসাহেব নামে ডাকে -- আভা !

আদতে ও চৈনিক কিনা তাও কেউ জানেনা ।

যার মুখে এই গল্প শুনেছি সে বলেছে যে ওকে দেখতে চীনাদের মতন কিন্তু ও আসলে কোন দেশ থেকে এসেছে সেটা কেউ জানেনা কারণ কেউ ওকে জিজ্ঞেস করেনি । হয়ত প্রয়োজন হয়নি ।

এখানে এসে ও এক Half সাহেবের বাহুবন্ধনে আবদ্ধ হয় । সাহেব একজন বাজিয়ে । মিউজিশিয়ান যাকে বলে ।

আভা একটা অদ্ভুত যন্ত্র বাজাতো ; প্লাঁম্ ।

সেই বাদ্যযন্ত্রই এই কপোত-কপোতীকে এক নীড়ে
বেঁধেছে ।

এই আভা -চো, আগে যেই দেশে থাকতো সেখানে সে
চুরট তৈরি করতো । ওখানে মেয়েরাও সবাই ধূমপান
করে । কেউ কিছু মনে করেনা । ওটা ওদের কালচারে
আছে । একটি চুরট কারখানায় সে কাজ করতো ।
সেখানে মেয়েরা সবাই- ঘন্টায় অঙ্গুস্র চুরট বানায় ।

সেটা রেকর্ড বলেই মানা হয় । এক একটি চুরট ইয়া
বড় সাইজের , এক ফুট । ওপরটা দেখে টুপি বলে
মনে হতে পারে । ওরা বলে :: শুরাট । ওর মা প্রথম
ওখানে কাজ নেয় । ওদের পরিবারে । মাও চুরট পান
করতো ।

আভারা সাত ভাইবোন মায়ের সাথেই ছিলো । কিন্তু
দেশে মিলিটারি শাসন হল আর শুরু হল গণ ধর্ষণ ,
হত্যা ও নানান ব্যাভিচার । হয়ত সেই কারণেই ওদের
মা নিজ হাতে সাত-সাতটি সন্তানকে ভিনদেশের
জাহাজে তুলে দেয় । ক্রীতদাস হিসেবে । খেয়ে পরে
বাঁচুক অন্তত: ।

পেটভাতায় খেয়ে , গতর খাটিয়ে বেঁচে থাকবে । দেশে
থাকলে মৃত্যু হবেই । কখনও না কখনও ।

আভা বিদেশে এসে -প্লাঁম্ বাজিয়ে সময় কাটাতে ।
চুরুটের মতন যন্ত্র, তাতে তার বসানো গীটারের মতন
। সেই তার নাড়িয়ে সঙ্গীতের মুচ্ছনা সৃষ্টি হয়
। অন্যদিকে ফুঁ দেয় । আর এই বাদ্যযন্ত্র বাঁশ দিয়ে
তৈরি হয় । সুমিষ্ট শব্দ ।



এই কাহিনী সবাইকে বলে **একটি গুলমোহর গাছ**, যার কোটরে পরেরদিকে আভা বাস করতো । গাছটি আগে ছিলো এক আজব দেশে । সেই দেশ, ওদের ধর্ম দ্বারা চালিত । বর্বর জাতীয় এই ডিসটর্টেড ধর্মের নাম **ফোফো চুঘতাই** ।

অসামান্য রূপবতী **গুলমোহর গাছ** । আর সে ফোফো-চুঘতাইয়া হলেও কিন্তু ফ্রি-থিঙ্কিং করতে অভ্যস্থ । কাজেই ছিলো এক মুক্ত মনের মানবী । ওর স্বামী ওকে সোসাল কাজের জন্য ত্যাগ করেন । ভদ্রলোক আসলে বিজ্ঞানী ছিলেন । ঐদেশে বিজ্ঞানের ওপরেও রিলিজিয়াস্ চাপ থাকে ।

প্রিন্স্ট যা চাইবে তাই হবে । যদি জলের সমীকরণ বলতে হয় **এন টু পি এইচ ৪ : N2PH4;**

তাহলে সেটাই বলতে হবে বিজ্ঞানকে অজ্ঞান করে ।

গুলমোহর গাছ তার স্বামীকে বলে বিদেশে পাড়ি দিতে । কিন্তু স্বামীজী ফতে আলি বলেন :: সবাই দেশ থেকে চলে গেলে , এত ব্রেন ড্রেন হলে দেশের কী হবে ?

সত্যি- অনেক স্কলারই তো চলে গেছেন । আমেরিকা ,
ব্রিটেন , ফ্রান্স এইসব দেশে । সেখানে বিজ্ঞানের নিয়ম
একই । সমাজের নিয়ম অন্য । তাই ।


কিন্তু গুলমোহর গাছ যার আগে নাম ছিলো -**গুলনার**,
সেই অসামান্য মেয়েটির পতিদেব দেশ ছেড়ে যাবেন না
। কাজেই ওকে একাই চলে আসতে হয় । ও একটু
মুক্তমনা বলে নিয়মিত পার্টি , খোলামেলা পোশাক ,
মদ্যপান , ধূমপান ও নাচ করতে ভালোবাসে । কিন্তু
ঐ সমাজে এগুলি অস্বীকৃত ও উচ্ছৃংখলতা বলে মনে
করা হয় । ওরা মেয়েদের ; ব্যান্ডেজ ভূতের মতন
আপাদ মস্তক কাপড় দিয়ে ঢেকে রাখে । কিন্তু তারা
সবাই এত রূপবতী ! সেই রূপ না দেখালে আর লাভ
কী ?

তাই গুলনার চলে আসে প্রবাসে । মুক্ত সমাজে ।
যেখানে এইসব জিনিসের কদর করা হয় । সবাই
সম্মান পায় এখানে এবং মানুষ-- সততা , সভ্যতা
আর কর্মসংস্কৃতির ওপরে জোর দিয়ে থাকে ; নানান
ট্যাঁবু না মেনে । কাজেই এখানে এসে সে খুব ভালো
আছে । তার এই জীবনে আর কিছুই চাইবার নেই বলে
এখন এক মহীরুহ হয়ে সবাইকে ছায়া প্রদান করে ।
এক প্রকার দেহত্যাগ করেছে আর কি !

শুরুটা হয়েছিলো রেড ক্রসে কাজ দিয়ে । সেবা দিয়ে ।
সেই সেবিকা থেকে এখন ও একটি গাছ । এমন গাছ যা
কেবল মানুষ ও পশুপাখির শীতল ছায়া নয় ; এই গাছ
গল্প বলে । প্রতিটি পাতা ও ডাল তার কথা ফোঁটায় ।
জীবন্ত তাদের নীরবতা । অঙ্কুরিত হয় শিলালিপি ।

এইদেশে যারা ক্রিমিন্যাল , জেল খাটে অথবা দেহ
ব্যবসা ইত্যাদি করে তারা যেকোনো সময় চ্যারিটিতে
যোগ দিতে পারে । কেউ প্রশ্ন করেনা ওদের ।

আস্তে আস্তে তারা নিজেদের দক্ষতা ও সততা দেখিয়ে
মেনস্ট্রিমে ঢুকে পড়ে । তবে এখানকার শাস্তি ব্যবস্থা
একটু ভিন্ন । লোহার গরাদের আড়ালে থাকলেও যার
যেটা ইন্সিকিউরিটি সেটা তাকে উপহার হিসেবে
দেওয়া হয় । যেমন যে পোকা ভয় পায় তাকে পোকাকার
মধ্যে ফেলা, যে অঙ্ককার ভয় পায় তাকে আলোহীন
সুড়ঙ্গে রাখা এইরকম ।



গুলনারের স্বামী ফতে আলি বেশ ব্রিলিয়ান্ট বিজ্ঞানী ।
কিন্তু হলে কী হয় ? ঐদেশে ধর্ম সব কন্ট্রোল করে ।

ধর্মযাজক না চাইলে বিজ্ঞানের সত্যগুলি লোক সমাজে
প্রচার করা হয়না । কাজেই পৃথিবীর বুক থেকে জল
কমে যাচ্ছে এই তথ্য ঐদেশে অনেকেই জানে না ।

ফতে আলিসাহেব যে সেই কারণে আলোক রশ্মি দিয়ে
স্নানের আয়োজন করেছেন এবং তার জন্য একটি
বিশেষ যন্ত্র নির্মাণ করেছেন তা চাপা পড়ে গেছে ধর্মের
কারণে । এই আলোক ছটা, ঐ যন্ত্রের মধ্যে গিয়ে
বসলেই নিজে থেকে বিচ্ছুরিত হবে । আর দেহ সাফ
হয়ে যাবে কোনো জল ছাড়াই । এতে কোনো পার্শ্ব
প্রতিক্রিয়া হয়না । আলোর রং আছে । গাঢ় লাল ।
অনেকটা রঙের মতন । যন্ত্রটি- অনেকটা আধুনিক
বিমান বন্দরের টয়লেটের মতন, ছোট খোপ কাটা ।

দেহ ; ক্লিন করে লিম্ফ গ্ল্যান্ড । প্রাকৃতিক উপায়ে ।
তাই লিম্ফ-গ্ল্যান্ডের অনুকরণে নাম দিয়েছিলেন :::
লিম্ফস্টিমা । কিন্তু ধর্মের কারণে ঐ যন্ত্র, মানব
সমাজের সম্মুখে আনা হয়নি । ওরা মনে করে জল
পবিত্র । অন্য কিছু দিয়ে দেহ সাফ হবেই না !

ফতে আলিসাহেব এখানেই থেমে থাকেন নি । উনি ব্রেনের নতুন কিছু এরিয়া লোকেট করেছেন যেখান থেকে মানুষের মাথায় এইসব কুসংস্কারের ভূত চেপে বসে । ঐসব এরিয়ার কথা আগে বিজ্ঞানীরা জানতেন না । একটি বিশেষ হরমোন যার নাম উনি দিয়েছেন **কার্স** , সেই হরমোনের কারণে ঐ অংশ অ্যাক্টিভেট হয় এবং মানুষ, পশুর মতন যুক্তিহীন আচরণে আবদ্ধ হয় । ধর্মে কেন এটা করতে বলা আছে সেটা লজিক দিয়ে না ভেবে অন্ধ অনুকরণ করতে শুরু করে ।

অর্থাৎ এটা একপ্রকার অসুখই । ফতে সাহেব মনে করেন যে জগতে নাস্তিকেরা আছেন বলেই সমাজে শ্বাস নেওয়া যায় । নাহলে এই ভন্ডের দল, নানান যুক্তিহীন অনুশাসনে বেঁধে মানুষকে কচুকাটা করতো ।

সুতরাং বোঝাই যায় যে তার আবিষ্কৃত এইসব বস্তু লোকসমাজে চর্চিত হবেনা কখনই । তবুও দেশের ও দেশের কথা ভেবে উনি ঐ দেশেই রয়ে গেছেন ।

গুলনার এখানে এসে মুক্ত-মেয়ে হয়েই আছে ।

প্রথমে অপরূপ শরীর দেখাতো । স্ট্রিপিং করতো । নিজ নগ্নদেহ, বিকাতো লোকসমাজে । এক এক করে নিজ বস্ত্র খুলে নিজেকে মেলে ধরতো পুরুষদের

সামনে । ইদানিং লেসবিয়ান মানুষও আসা শুরু করে । কাজেই ক্লায়েন্ট বেড়েছে । কিন্তু সেইরকম এক মহিলা ক্লায়েন্ট- যে একটি ব্যাঙ্কে লোন অফিসার ছিলো তারই উৎপাতে কাজ ছাড়তে হয় । মেয়েটি সমকামী কেউ জানতো না । আর তাই ওকে মলেস্ট করলে কেউ বিশ্বাসও করতো না । ওর ন্যাংটো শরীরটা নিয়ে যাচ্ছেতাই করতো , ওর পিছুধাওয়া করে টয়লেটেও চলে যেতো । গোল গোল চোখ করে বলতো :: তোমাকে আমি চুষবো , চাটবো ।

শেষে ও কাজ ছেড়ে দেয় । অনেক বছর তো এসব করলো । এখন প্রায় চল্লিশের কাছে । যৌবন ঢলে যেতে যেতে ও নিজেও চলে যেতে চায় ।

হরমোন ইঞ্জেকশান নিয়ে বস্ত্রহরণের খেলায় মাততে চায়না । হয়ত তাই রেড ড্রসে, সমাজ সেবার কাজ নেয় । আর এখন বৃক্ষ হয়ে সবাইকে শীতল ছায়া দেয় । মেটামরফসিস্ । মেটাফোর্ । মেসমারাইজিং ।

ফসিল ফসিল ফসিল । ওর চেতনা ফসিল হয়ে গেছে ।

সে নিজেই আভা চো-র গল্প বলে সবাইকে । আভা চো নাকি আগে খুব মাংসাশী ছিলো । পর্ক ও ডিম খেতো । ছইস্কি পান করতো ; তারও আগে ভাত পচানো দেশী মদ । আর খুব স্মোক করতো । এখন বদলে গেছে ।

আভা চো-র স্বামীর এটা তৃতীয় বিয়ে । প্রথম স্ত্রীকে বিয়ে করে যখন ওরা দুজনেই মাত্র ১৫ । ম্যাকডোনাল্ডের টয়লেটে সেক্স করতো । বাড়িতে কেউ ওদের স্বীকার করেনি । তাই । স্ত্রীর ভীষণ মুখ খারাপ ছিলো । প্রোফ্যানিটিতে ডক্টরেট । ১৮ বছর বয়স হলে দুজনে একসাথে থাকা শুরু করে । দুই মেয়ে হয় ।

বৌটি কাজ নেয় রিয়ল এস্টেট এজেন্ট হিসেবে । আর আভা চো এর স্বামী, টেক্সিক কেমিক্যালের কারখানাতে কাজ নেয় । এইসব এরিয়াতে বেশি লোক যেতো না তখন, প্রাণ ভয়ে । কাজেই কমোডিটি ট্রেডার হতে সময় লাগেনি তার । সমাজে আমরা যাকে বিষ মনে করি , মগনলাল মেঘরাজের মতে :: বিস্ খুব খারাপ জিনিস্ আছে !

সেই বিষই এদের কাছে অমৃত । বিষ যেন খুব তাড়াতাড়ি- ওদের ধনসম্পদ ঢেলে দিয়েছে । আজকাল কোথায় না বিষ লাগে ? মারণাস্ত্র থেকে শুরু করে গৃহস্থের রোজনামচা--সর্বত্র । তাই সমুদ্র মন্থন করেই সেই বিষ ধারণ করেছে নিজ কণ্ঠে, আমাদের ক্ষ্যাপা দেবতা , শিবশঙ্কু নন স্বয়ং আভা চোয়ের স্বামী ::
দাফা তেগু চো ।

প্রথম স্ত্রীকে ভালোবাসলেও সে ওকে ছেড়ে অন্য পুরুষে যায় । এক ফ্লেঞ্চম্যান । আদ্রিয়ান । পেশায় নাবিক । নানান দেশে ভেসে বেড়াতো । বন্দরে বন্দরে বৌ কিনা **দাফা তেগু চো** জানেনা । তবে নিজ বৌ খোয়া গেলো, আদ্রিয়ানের কল্যাণে । দুই মেয়ে নিয়ে এক ধূসর গোধূলিতে, হাওয়া হয়ে যায় ওর বৌ । এখন সবাই তাকে পত্রিকায় দেখে । ম্যারেজ কাউন্সিলার হিসেবে খুব নাম করেছে কিনা ! রিয়ল এস্টেটে আর নেই । তবে ওকে দেখানোর জন্যেই বোধহয় আমাদের দাফা তেগু চো এক বিশাল টাওয়ার নির্মাণ করে । **চো টাওয়ার** । যেখানে সে বেঁচে থাকাকালীন আভা থাকতো । এখন বেরিয়ে এসেছে বাণপ্রস্থে ।

প্রথম বৌয়ের দুই সন্তানকে পেলেছে **দাফা তেগু** নিজেই । বৌয়ের কাছে ছিলো ওরা কিন্তু চো নিয়মিত টাকা দিতো আর দেখাও হত । কারণ ওরা ওর নিজের মেয়ে

আর আদ্রিয়ান, পরে কোনো কাজ করতো না । নিজ দেশে থাকতে, সে নাকি খুব কর্মঠ ছিলো । তাই নাবিক হয় । অ্যাডভেঞ্চারের নেশা ছিলো । পরে বিদেশের কোনো দেশে ; সম্ভবত: ভারতে , সে থর মরুপ্রান্তে মানুষকে জল সরবারহ করতো । গিয়েছিলো ওখানে কাজ নিয়েই । কিছু গ্রামের মানুষ নানান শস্য যেমন বাজ্রা, সর্ষে , মূলো ইত্যাদি চাষ করতো শুষ্ক মরুতে । সেই শস্য বাজারে বিক্রি করে দিন কাটাতো । তাদেরই ছেলেপুলেদের লেখাপড়া করানোর জন্য সরকার অনেক স্কুল খোলে । মজার ব্যাপার হল এখানে মাইনে নেই । থাকা ও খাওয়া-পরা ফ্রি ।

বদলে সরকার উটের ভরণ পোষণ করতে বলতো । সপ্তাহে তিনদিন স্কুল খোলা থাকে । বাকি সময় উটপালন ।

হাতে মাইনে না পেলেও এখানে মাসে একবার করে বিরাট লটারি হত । সেখানে প্রায় সবাই কম করে ১০০০ টাকা পেয়ে যেতো । টিকিট কাটলেই ১০০০ টাকা । তাই হয়ত আদ্রিয়ান ওখানে জল ফেরি করতো । ওর জল থাকতো মহাসাগরে । সেই অলীক জল, বালি মাখা হলেও অসম্ভব মিষ্টি ও শীতল ।

ধূসর, রুক্ষ মরুতে এই জলের উৎস হল নাবিক আদ্রিয়ানের মন সমুদ্র । সমুদ্রে অটেল জল । কোনো

শেষ নেই । লহরী কেবল নোনা । নুন তরঙ্গ । তাই
হয়ত বা এতগুলি সমুদ্র ও মহাসমুদ্র থাকতেও আজ
দুনিয়ায় জলের আকাল । নিজের মুত্র নিজেকেই পান
করতে হচ্ছে শ্রেফ জলের অভাবে । পরিবারের সবাই
মুত্র ত্যাগ করে জলের পাত্রে । কলসে, জগে, ওয়াটার
বটলে । সেই প্রস্রাব পান করে নির্ধিধায় , সবাই ।
কারণ উপায় নেই । শাস্ত্রে যখন বলা হয়:: অতি
লোভে তাঁতি নষ্ট ; তখন পন্ডিতেরা বাঁকা হাসি দেন।
বলেন :: ওসব ওল্ড আইডিয়া ।

এখন বাথরুম উঠে গেছে । প্রতিটি মুত্রকণা এখন
মূল্যবান । সবাই :: বাঞ্ছারামের মতন :: এই নাও
শিশি, এতে ধরে রাখো হিসি ফিলোসফি মানতে বাধ্য
হচ্ছে ।

তাই -সামুদ্রিক নুন ছেকে নিতো আদ্রিয়ান তার মন
কলসে । তারপর জল সরবারহ করতো দক্ষ প্রান্তরে ।
নির্মল জল । আজকাল বিজ্ঞাপনের যুগ ।

লেখা হত :: জলের স্বাদ ফিরে এলো ।

কিংবা : ড্রিংকিং ওয়াটার -ফ্রম টয়লেট টু সি বিচ্

মাঝে তো বাথরুম অনেকটাই মন্দিরে পরিণত
হয়েছিলো !

পরে সেই মানবদরদীই এসে, দাফা তেঙু চোয়ের প্রথমা
স্বত্ৰীকে নিয়ে চম্পট দেয় । শেষে দাফা তেঙু, এক
অন্য নারীতে যায় । তাকে বিয়েও করে । নাম তার
ইলিয়া । ইলিয়া, দাফার চেয়ে অনেক ছোট ।
কুতকুতে চোখ । উন্নত নাসিকা । সোনালী চুল ।
কেমন যেন আল্‌নার মতন দৈহিক গড়ণ তার !

অনেকগুলি সন্তান হল তো ওর । কিন্তু বেশিরভাগই
মারা গেলো । লোকে বলে, ওদের বাবাই ওদের হত্যা
করেছে । মায়ের গর্ভে । বাচ্চা হবে শুনলেই ওকে
অ্যাবর্ট করাতে দাফা তেঙু । পরে অবশ্য তিন
সন্তানকে গ্রহণ করেছে লোকটি । আগেরগুলি সবই
মায়ের পেটেই মারা গেছে ।

আজকালকার বাচ্চা তো ! জন্মের আগেই বাবার সব
ব্যাবিচারের কথা, টুইট্ করে গেছে ।

ইন্সটগ্রামে ফটো দিয়ে গেছে কীভাবে ওদের অ্যাবর্ট
করছে দাফা তেঙু । সারা দুনিয়া দেখছে !

এতগুলি সন্তানকে নৃশংসভাবে গর্ভে, হত্যা করেছে বলেই কিনা কেউ জানেনা দাফা তেগুর দ্বিতীয় বৌ পালিয়ে যায় । তারপর আভাকে বিবাহবন্ধনে আবদ্ধ করে, বাজনার জন্য । ওর সং সন্তানেরা, ওকে মা হিসেবে গ্রহণ করে । শ্রদ্ধা করতো, ভালোবাসতো । বলতো :: সি ইজ অ্যান অ্যামেজিং মাদার !

কিন্তু স্বামীর মৃত্যুর পরে, চো টাওয়ার ছেড়ে আভা বেরিয়ে আসে । কোনো ঝামেলা না করেই । বলতো :: আমার সাংসারিক জীবন শেষ হয়ে গেছে ।


বাইরে এসে, ঐ গুলমোহর গাছের কোটরে থাকতো । আগে অরণ্য থেকে কাঠ যোগাড় করতো । কাঠগুলো লোকে সস্তায়- জ্বালানি, ফায়ারপ্লেসের কাঠ হিসেবে কিনে নিতো । এখন বয়স হয়েছে বলে ও মাটির জিনিস বানায় । কুমোরদের মতন । অল্প কাজ করে । ওর একার চলে যায় । নিজে মাস্টার চুরুট বাঁধিয়ে হলেও ওসব আর করেনা । স্বাস্থ্যকর নয় বলে ।

মাটির জিনিস বায়ো ডিগ্রেডেবল । দেখতেও ভালোলাগে । মাটির সুগন্ধ লেপ্টে থাকে প্রতিটি কণায় ।

বুড়ো বয়সে মাটির কাজ শিখে নিয়েছে আভা চো । যে
চৈনিক কিনা তাই নিয়ে লোকের মনে সংশয় আছে ।

তবু তাকে কেউ কোনোদিন প্রশ্ন করেনা !!

কারণ তাতে কিম্ব সত্যি কারো কিছুই যায় আসেনা ।



বন থেকে কাঠ কুড়িয়ে বিক্রি করা আভা চো, থাকতো
গুলমোহর গাছে । প্রাসাদ থেকে বেরিয়ে এসে । এখন
মাটির রূপকার । ওর স্বামী নেই । মারা গেছে । আভা
বলতো গুলমোহর গাছকে ::আমি আর কাকে বাজনা
শোনাবো ? কী করবো ঐ মহলে থেকে ? মহলে আমার
দমবন্ধ হয়ে আসে । ওখানে পুতুল আছে , মানুষ নেই
। কেন মানুষ পুতুল হয়ে যায় ? কেন সমুদ্র মশ্বন করে
শান্তিবারি নিয়ে আসা মরুমানুষ হঠাৎ অন্যের স্ত্রীকে
নিয়ে পলায়ন করে ? কেন নিজ বা আত্মীয় সন্তানকে
এক এক করে হত্যা করে, মামা কংসের মতন
কোথাও, কেউ ?

নি:সঙ্গ সন্ধ্যায় মনে হয় একটা চোর অন্তত: আসুক ।
মানুষ নেই । জনমানবহীন প্রান্তরে একটি বন আর
গুলমোহর গাছ । সেখানে বাস করে আভা চো নামে
এক ধনী ব্যবসাদারের প্রিয় স্ত্রী , সৎ বাচ্চাদের
একান্ত আপন মা । মাংসাশী আভা এখন নিরামিষ
খায় । চা গাছের পাতা দিয়ে তৈরি এক আচার আর
মোটো রুটি । সেই রুটি আগুনে শেঁকে নেয় । বড় বড়
আটার দলা হাতে চেপ্টে নিয়ে ছুঁড়ে দেয় আগুনে ।
পুড়ে তৈরি হয় রুটি । চা পাতার আচার আর বুনো

শিম্, ঝিঙে জাতীয় সবজি, নানান বুনো শাক্ ও কচু
খেয়ে দিন কাটায় আভা চো ।

নিজের পূর্বাশ্রমের কথা বড্ড মনে পড়ে । দিনান্তের
ফিকে আলোয় বসে । গুলমোহর গাছ তখন কথা
ঝরায় । সুরবাহারে প্রাচীন তান ।

ডোমেস্টিক ভায়োলেন্স , চুরট কারবারি মায়ের
বিচ্ছেদ- তার বাবার সাথে , মায়ের নিজ হাতে সব
সন্তানকে ক্রীতদাস করে বিদেশে প্রেরণ - এক এক
করে মনের স্ক্রীনে ভেসে ওঠে । সত্য হজম করাই
সবচেয়ে কঠিন । রিয়েলিটি সবচেয়ে শক্ত । হীরে
কিংবা প্ল্যাটিনামের চেয়েও । জীবনটা কারো স্কেচ করা
নয় । এক অজানা স্ক্রিপ্ট । শুধু অভিনয় করে যেতে
হয় শেষ অঙ্ক অবধি । এই নিয়ম জগৎ সংসারের ।

আভা নাকি বলতো ::: আমি তেমন কাউকে আমার
জীবন নিয়ে লিখতে দেবো যে একটি সরলরেখায় আমার
জীবনী লিখতে সক্ষম । পয়েন্ট টু পয়েন্ট । পোভার্টি টু
পোভার্টি ।

কথায় বলে :: মর্নিং শোস্ দা ডে ।

এগুলি আভার জীবন দর্শন । ওর মা চুরুটের মতন
প্রাণ নাশ করে এমন জিনিসের কারবারি । ওর বাবা
ছিলো শিকারী যে অকারণে বন্য পশু শিকার করতো
নিছক মজা দেখার জন্য । আগে শিকারে সাহায্য
করতো । গাইড হিসেবে । রাজা গজাদের । পরে নিজে
পোচিং করা শুরু করে । আর এদিকে আভার স্বামী
তো তার সিংহভাগ সম্পত্তি গড়েছে বিযাক্ত বস্তু
কেনাবেচা করে । কমোডিটি ট্রেডার অফ টস্কিন ।

বিষ ব্যবসায়ী । বিষ কেনাবেচা করে জীবন কাটায় ।
কারো কাছে যা বিষ ওর কাছে তা অমৃত । গরল নয় ।
অমৃত , গরল এসব তো আমাদের মনে । সাপের বিষ
যাকে বলো তা তো সাপের নিজস্ব । গরল নয় । কত
বিষবৃক্ষ , বিষ ছড়ায় । সেগুলি গাছের আঅজ ।
আমাদের বিষ ।

কপাল কুন্ডলাও তো কারো না কারো মেয়ে ?

আচ্ছা , আভা চো সম্পর্কে পাঠকেরা কী শুনতে চায়
? কী ভাবে ?

আমি যা ভেবেছি সেটা হল এই যে আভা কোনো
সাধারণ রমণী হতেই পারেনা । স্রষ্টারা শুধু চরিত্র
গাঁথেন না , চরিত্রকে পথ দেখান । আমি মাটির জিনিস
বানাই না , মাটি-শিল্পী নই আমার চরিত্রের মতন ।
ইন্ফ্যাক্ট আমি মাটিতে ঘৃণায় হাতই দিইনা ! তাই
আমার রক্তমাংস দিয়ে গড়া **আভা চো** হবে ঠিক
এইরকম -----!

আভা চো নিজেকে শান্তি দিতে রং জোছনায় ডুবে যায়
। অর্থাৎ কালার থেরাপি করে । সুন্দর সুন্দর রং দিয়ে
মাটির কলস আঁকে । তার গায়ে রঙীন , রঞ্জোলি
বানায় । আর সেই রং মানুষের চেতনায় আনে ঠাণ্ডা
ভাব । যখন কাউকে সে মাটির পাত্র বিক্রি করে তখন
মোলায়েম হাতে স্পর্শ করে ক্রেতার দেহ । আর রং চং
মাখা পাত্রটি হাতে নিয়েই ক্রেতা ডুবে যায় এক অমল
শান্তির পারাবারের ।

মাটি যেমন পুড়ানো হয় সেরকম আভা নিজেও
নিজেকে আগুনে পোড়ায় । প্রতি সপ্তাহে , একবার
করে । এতে তার দেহ পোড়ে না । মনটাকে পোড়ায় ।

দেহ একইরকম থাকে । কাঠকুটো জুটিয়ে নিজেই
নিজের চিতা তৈরি করে । তারপর তাতে অবগাহন
করে । মন পুড়ে গেলেই উঠে আসে ; আগুন থেকে ।

চারিপাশে ভস্ম থাকে । আভা কিন্তু পোড়েনা ।

শুধু প্রতি সপ্তাহে, পাখির ডানায় উড়ে আসা সভ্যতার
ভেজাল যা ওর মনে বাসা বাঁধে তাকে পুড়িয়ে ফেলে ।

খুব অদ্ভুত তাই না ? আভার প্রথম প্রেমও আজব ।

আকাশের চাঁদ ওর ফাস্ট ফ্লেম । পূর্ণিমার চাঁদ ।
ওদের দেশে বলতো :: পৌর্নিম্ ।

সেই তার ফাস্ট-ক্রাশ্ ।

সেই আভাই একদিন হঠাৎ মারা গেলো । আগুনে
পোড়ে তার মন , দেহ নয় । তাই ওকে কবর দেওয়া
হবে সম্ভবতঃ । আভার মৃতদেহের ওপরে ঘুরে বেড়ায়
অজস্র মাছি নয় , চিস্তার রেখা । চিত্র । ওর বাবার
জীবন । মায়ের কষ্ট ও ভাইবোনদের নিজস্ব জীবন
যাপন । আমি কেবল ওর বাবার জীবন-যুদ্ধটাই দেখতে
পেলাম, আতসকাঁচ দিয়ে ।

আশ্চর্য চেতনার স্ফুরণ ।

আভা চোয়ের বাবার জীবন । অদ্ভুত মানুষ ছিলো সে ।



আভাদের গ্রামে সবাই পালোয়ান । পুরুষেরা । বংশ
পরম্পরায় তারা পালোয়ান-গিরি করে কাটায় ।

ছোট থেকে কুস্তি করা , দেহচর্চা , লাঠি খেলা
ইত্যাদিতে অভ্যস্থ হয়ে ওঠে । পরে বিভিন্ন শহরে ওরা
বাউন্সারের কাজ করে । অর্থাৎ বডিগার্ড । নতুন
প্রজন্মের সবাই, নানান প্রফেশনের হাতছানি এড়িয়ে
বাউন্সার হতেই চায় । সবাই ম্যানলি, বডি বিল্ডার আর
ব্যায়ামবীর কিন্তু ওরা কর্মী , অ্যামেচার নয় ।

আজকাল হৃদরোগ আর সুগারের যুগে সবাই ফিট
থাকতে চায় । জিম করে নিয়ম করে, শখে নয় । কিন্তু

এই গ্রামের সবাই আখড়ায় যায় ছোট থেকেই । যখন দেহে বাসা বাঁধেনি কোনো অতিরিক্ত মেদ কিংবা চর্বি । ওরা কুস্তির সঙ্গে ভারোত্তলন আর যোগব্যায়াম করে । খায় পরিমিত মানে ওদের যা প্রয়োজন সেইরকম । সফেন চালের ভাত, থক্‌থকে ডাল, ছানা , রাজ্‌মা, কলা , খাঁটি দুধ, মাংস, ডিম, ফলমূল এইসব খায় । ওরা মদ, সিগারেট পান করেনা ও ড্রাগস্‌ নেয় না । এমনকি সাপের ছোবলও নেয় না নেশার জন্য (snake venom) --একদম ফিট্‌ বডি !

ওরা পর্গো দেখেনা, নগ্ন নারীদেহে হাত বোলায় না । মনের দিক থেকেও একদম নির্মল ! বড় বড় শিলাখন্ড, লোহার বল, বিশাল যন্ত্র তুলে দেহচর্চা করে । নিজেদের কাজ নিয়ে গর্বিত । কারণ ওদের জন্যই আধুনিক হিংসার যুগে, বড় বড় মানুষেরা সুখে থাকতে পারেন ও কাজকন্স্‌মা করতে সক্ষম ।

ওদের গ্রামে প্রচুর বাঁশবন । বাঁশগাছ । সেই বাঁশ ওদের কাজে লাগে । জলোচ্ছ্বাসে ভরা নদীর নামও বাঁশমণি । আরেকটি ঝিল আছে তার নাম বাঁশরি ।

ওরা তুলসী গাছের মতন বাঁশগাছকে মনে করে পবিত্র । বাঁশগাছের পূজো করে । বাঁশের উপকারিতা নিয়ে

এতই সরব ওরা যে বলা হয় ::যেখানে বাঁশগাছ নেই
সেখানে মানুষ নেই ।

ওরা খুব বাঁশিও বাজায় । সেই সুরে পেখম মেলে নেচে
ওঠে ময়ূর । রামধনু রং এর আবার সাদা ময়ূরও ।

কাজেই আভার বাবাও আগে বাউন্সার হয়েই কাজ
করতেন এক বড় শহরে । সেখানে এক প্রাক্তন
দেহপসারিনী, হাই প্রোফাইল ক্লায়েন্টদের সিউকিউরিটি
সাপ্লাইয়ের কোম্পানি চালাতো । কাজ করতে করতেই
এক যুবরাজের নজরে পড়ে আভার বাবা ঘাসিলিং ।

সেই যুবকের শখ ছিলো বেয়াড়া শিকার , ফাস্ট রেসিং
কার ও জুয়া । ভদ্রলোকের বডিগার্ড হয়েই শিকারের
নেশায় পায় ঘাসিলিং-কে । ছুটিছাটায় বনে যেতো ওরা
। নিরীহ পশুদের হত্যা করতো নেহাতই মজা দেখার
জন্য । তারপর বুনো শূকর , হরিণ ইত্যাদি পুড়িয়ে
খেতো । সবাই মিলে । নিয়মিত এরকমভাবে নির্মল
কতগুলো পশুকে বিনা কারণে মেরে খেলা করার জন্য
আভার মা প্রথমদিকে ওর বাবার খুব সমালোচনা
করতো । বারণ করতো । পাপ করতে না করতো । -
-অসহায় জীব, অবলা জীবদের কেন মারো তুমি ?

--ওটা আমার নেশা ও পেশা । ওরা আমার মালিককে
আক্রমণ করতে পারে ।

আভার মা জানতো যে এটা অসত্য । পশু শিকার ওর বাবার পেশা নয়, নেশা হয়েই গেছে । মদের নেশার মতন । অনেকবার বারণ করেও শিকার বন্ধ করা যায়নি ।

আভার মা তো চুরুট বাঁধিয়ে ছিলো । তাই পশুহত্যা নিয়ে সরব হলেও ওর নিজের কাজও মানুষের স্বাস্থ্যের জন্য মন্দ বলে হয়ত ভেতরে ভেতরে একটু মিইয়ে থাকতো । শেষকালে অবশ্য এই শিকারের নেশার জন্যই ওর বাবা ও মা আলাদা হয়ে যায়-ভিন্নমতের কারণে ।

--চুরুটের ধোঁয়াও মানুষ মারে । আমি পশু মারি আর তুই মানুষ মারিস্ ! বলতো আভার বাপ্ ।

--তুই খুনী ; তুই বেশি পাপ করছিস্ । তোর নরকেও ঠাই হবেনা । আমি পশুদের একবারে মারি বলির পশুর মতন এক কোপে । আর তুই ধীরে ধীরে প্রাণ নিস্ । ওরা জানেও না যে তুই ওদের হাতে চুরুটের নামে বিষতীরের ফলা তুলে দিস্ ! ওদের বলিস্ যে তোরা নিকোটিন কম আর ভেষজ বেশি দিস্ আর তাই শুনে ওরা বেশি করে কেনে কিন্তু আমি জানি যে তোরা আসলে ওতে ড্রাগ্‌স্ মেলাস্ ।

তারপর শুরু হতো বাউন্সারের অত্যাচার । মার ।
মেরে ওর মাকে শুইয়ে দিতো ওর বাবা, ঘাসিলিং ।
পুরো ১০০ শতাংশ যোগব্যায়াম আর কুস্তির বিদ্যা
প্রয়োগ করতো পত্নীর দেহের ওপরে । যেন বৌ তার
অপোনেন্ট !

বলতো :: এবার শুধু শিকার নয় , তোর হাড় দিয়ে
ডুগডুগি বাজাবো।

আভার মা আলাদা চলে যায় । পরে সন্তানদের
ক্রীতদাস করে পাঠিয়ে দেয় দূরদেশে । কীইবা করবে
সে ? এতগুলি সন্তান নিয়ে একার রোজগারে কি চলে ?
তাও স্বপ্ন কিছু আয় দিয়ে ?

বরং অন্যদেশে গেলে বাচ্চাগুলি বেঁচে-বর্তে থাকবে !

এইরকম ভায়োলেন্ট পরিবারের মেয়ে আভা চো ।

যে চৈনিক কিনা কেউ জানেনা ।

স্বেচ্ছাচারী, পালোয়ান ও মুড়ি বাবার জীবনটাও একটা
জীবন বটে ! মনে হয় আভার । তাই হয়ত আভা ওর
বাবা, চুরুট বাঁধিয়ে মা ও বিষ ব্যবসাদার স্বামীর ভুলের
মাশুল দিচ্ছে এইভাবে কালার খেরাপি করে ও মাটির

ইকো ফ্রেডলি বস্তু বেচে । ওর বংশের ব্যালেন্স শিটে
কিছু পুণ্যর এন্টি করছে ।

আভার মৃতদেহর পাশেই দুলছে ওর আত্মা । একটি
দোলনায় । গুলমোহর গাছের কাছে বাঁধা একটি দোলনা
। সেখানে ঝুলন্ত, আভার চেতনা । কনশাস্‌নেস্‌ ।
দর্শনে বলা হয় যে আমাদের শরীরের মধ্যে আমাদের
মন -এই ধারণা ভ্রান্ত । আসলে আমাদের মনের অন্তরেই
আমাদের দেহ । দেহও আরেকটি থট্‌ । সলিড থট্‌ ।
তাই বুঝি দেহ গলেও মনটা দুলছে ঐ দোলনাতে ।
চেতনা ঝুলে পড়েছে !

আর ফুলঝুরির মতন চিস্তার স্ফুলিঙ্গ এদিক ওদিকে
ভেসে যাচ্ছে । তারাবাজি । আমাদের মন আসলে
তারাবাজি । পুড়তে পুড়তে একসময় অবিনশ্বর আলো
হয়ে যায় । শেষ স্ফুলিঙ্গ উড়ে গেলেই !

পাঠকের কি জানা আছে যে প্রতিটি চরিত্রের জার্নি,
রক্তমাংসের মানুষের জীবনযাত্রার চেয়ে কিছু কম
আকর্ষক নয় ? আর তাই হয়ত ক্যারেক্টরদের ঠিক
ততটাই ফ্রিডম্‌ প্রাপ্য যতটা মানুষের নিজের !
লেখকের এত স্পর্ধা কোথার থেকে আসে যে ওদের

রেখাবন্দী করে ফেলে ? তাই বুঝি , চরিত্রের স্বাধীনতার লড়াইয়ে নেমেছে ! ওরা চাইছে- ওদের প্রতিটি ডায়মেনশান যেন খুলে রাখা হয় । ওরা স্রষ্টার তুলিরেখায় বাঁধা থাকতে অনিচ্ছুক । ওরা ফ্রি -স্পেস চায় । তাই আমি আভাকে এতটা ফ্রিডম্ দিচ্ছি । এখানে আমার ইগোর চেয়ে আভার ইগোকে আমি বেশি সম্মান দেবো । আমি ওকে আবার গড়ে তুলবো, হ্যাঁ- এই একই নভেলায় ! অণু উপন্যাসের বিচ্ছুরণে ।

স্পেক্ট্রামের আভা সে এখন । আকরিক বর্ণালি !

আভার বাবার একটি পাতানো পুত্রও ছিলো । তার নাম পানাদা। তাকে- বছরখানেক বয়সে , বনে কুড়িয়ে পেয়েছিলো ওর বাবা । লোকে অবশ্য বলে যে সে আসলে আভার বাবারই অবৈধ সন্তান । কার গর্ভে সে জন্মেছে সেটা কেউ জানেনা । ওর মা ঐ ছেলেকে নিজের সংসারে রেখেছিলো । পানাদা ভালো মানুষ । সহজ সরল ছেলে । আগে তো বনে, ও হাতির সাথে বেড়ে উঠেছিলো । একটি হাতির পালের সাথে । কটি বাচ্চা হাতিও ছিলো । পরে ওদের নিয়ে গেলো লোকেরা, কতগুলি মন্দিরে রাখবে বলে । ওদের দেশে ধর্মস্থানে হাতি ছিলো । যদিও মিলিটারির শাসনে এগুলি বন্ধ করার চেষ্টা হয় তবুও কিছু কিছু

প্রভাবশালী , বর্ধিষ্ণু পরিবার তাদের প্রাইভেট মন্দিরে একটি করে হাতি রাখতো । সেই হাতি রোজ দুইবেলা ভক্তদের মাথায় শূঁড় ঠেকিয়ে আশীর্বাদ করতো । মন্দিরের মোটা ইনকাম হতো কারণ ভক্তরা এর বদলে টাকা দিতো ।

অনেকে বলতো যে জংলী হাতির কী অধ্যাত্মিক শক্তি থাকতে পারে তা ঈশ্বরই জানেন !

পানাদা ; বনে হাতির সাথে বেড়ে ওঠায় ওকেও নিয়ে যায় মন্দিরের লোকেরা । ও সেখানে হাতির দেখাশোনা করতো । কারণ ওকে হাতিটি, শৈশব থেকে দেখেছে ও চেনে । হাতি খুব বুদ্ধিমান পশু । তাই পরিচিত মাহুত হলে সুবিধেই হবে । কাজেই পানাদা ওখানে কাজে লেগে পড়ে । আভার মা ওকে প্রথমে যেতে দিতে চায়নি, এন্তো বড় পশুর কাছে ।

বলতো :: **যখন ছোট ছিলো ও, তখন হাতিও বাচ্চাই ছিলো । এখন সে পাহাড় প্রমাণ । পানাদাকে এক জখমেই, খতম্ করে দিতে পারবে ।**

কিন্তু আভার বাবা ঘাসিলিং আর পানাদা নিজেও মন্দিরে যাবার ব্যাপারে উৎসাহী ছিলো বলেই শেষরক্ষা হলনা ।


একদিন শুভ না অশুভ লগনে পানাদা চলে গেলো মন্দিরে । প্রথমদিকে ভালই ছিলো । পরে গাঁজার

নেশায় ধরে । ততদিনে আভার বাবা শিকারের নেশা ছেড়ে পোচারের কাজ শুরু করেছে । অর্থাৎ চোরাশিকারি । এতে অনেক পয়সা হয় । একই শিকার করে **অনেক অনেক** টাকা লাভ হয় । বর্ডার পার করার অন্য লোক আছে । তাদের অনেকেই সমাজের ওপরতলার মানুষ ও বাউন্সার ।

জলের মতন টাকা আসতে থাকে ওর বাবার চোরা কুঠুরিতে । খালি মদ আর পশুহত্যা । এইভাবেই চলতো জীবন । মা আলাদা হয়ে গেলো । পানাদা চলে গেলো মন্দিরে । ওরা সবাই ভিনদেশে , ক্রীতদাস হয়ে ।

আজকাল ক্রমবর্দ্ধমান মিডিয়ার দৌলতে তো নানান জিনিস দেখা যায় । সেভাবেই কোনো লোকমাধ্যমের কৃপায়, আভার বাবার নাম পৌঁছে যায় এক ওয়াইল্ড লাইফ ফিল্ম মেকারের কানে । এইরকম দুর্ধর্ষ শিকারি ও বাউন্সারের জীবনের ওপরে সিনেমা করতে সেই মেয়ে বন্ধপরিকর । বিদেশী মেয়ে, সোনালী চুলের **হারপারই** ওর বাবাকে একপ্রকার ফিরিয়ে আনে সভ্যতায় । তার জীবনের ওপরে সিনেমা করার বাসনা নিয়ে গেলেও, ফিরে আসে বিজয়িনীর হাসি হেসে ।

কারণ জীবনটা বদলে দিতে পেরেছে নায়কের ;
সিনেমার বাইরে । ঘাসিলিং এখন এক সুস্থ সবল
সাধারণ মানুষ । তার উচ্চাশা আর পালোয়ান গিরির
নেশা তাকে ছেড়ে চলে গেছে ঠিক আভাদেরই মতন ।



পানাদা তো মন্দিরে কাজ করতেই ব্যস্ত । ছেলেটিকে ঠিক মতন পয়সা দিতো না মন্দির কমিটি । অতিরিক্ত পরিশ্রম করাতো । হয়ত তাই ও গাঁজা সেবন শুরু করে । ইউফোরিয়ার লোভে । সব ভুলে থাকা । বিষাদ রেণুর, পুষ্পে রূপান্তর !

হাতির সাথে ভালই সখ্যতা ছিলো পানাদার তবুও কোনো এক অশুভ লগ্নে সেই হাতির পদতলে পিষ্ট হয়েই নিহত হয় ছেলেটি । ভালোমানুষের পোর দেহটা, একটা দুমড়ে মুচড়ে ফেলা পপকর্ণের প্যাকেটের মতন পড়েছিলো --লগ্নভ্রষ্ট মন্দিরে এক ব্রতচ্যুত ক্ষাপা পশুর কারণে । দিনের পর দিন অসহ্য রোদে বাঁধা থেকে থেকে পশুটি ক্ষেপে ওঠে । নির্মম আঘাত হানে, শৈশবের সখার দেহে । পানাদার দেহটি ; ওর পালক পিতার কুস্তির কোপে পড়া কোনো মানুষের- ভগ্ন দেহাংশের মতন পড়ে ছিলো । একেই বুঝি বলে কর্মের বৃত্তাকারে ঘোরা । বাউন্সারের ; শূন্যে ছোঁড়া প্রতিটি ঘুঘি বাউন্স করে, ফিরে এসেছে পুত্রের দেহে । হোক্ না পালিত পুত্র , আত্মজ তো বটেই !

হাতিকে নিয়ে গেছে বনবিভাগ । ওকে মেরে ফেলার কাজ পড়েছে আভার বাবার ওপরে । শিকারি হিসেবে আগে তো তার নাম ছিলো । এই ক্ষ্যাপাটে হাতির মুখোমুখি হতে কেউ রাজি নয় আসলে ।

সেদিনই বোধকরি সার্থক হল ঘাসিলিং এর শিকার । কে জানে !



ঘাসিলিং, ততদিনে গাছের কাঠ কেটে মানে কাশটা কেটে তার ভেতরটা চেঁচে নিয়ে, বড় বড় পাইপ নির্মাণের কাজে লেগেছে । ঐ অঞ্চলে এগুলি হয় । সেই কাঠের অংশ দিয়ে ওরা এক আজব ড্রাম মানে বাদ্যযন্ত্র বানায় । ওর বাবা ঐ ড্রাম তৈরির কাজ কিছুদিন করে । কিন্তু সুরেলা ড্রাম তাকে বাঁধতে পারেনি । কারণ আভার মায়ের ভাবায় ঘাসিলিং তার স্বামী হলেও ছিলো আসলে এক অসুর !

সুরের মূর্ছনায় অস্বস্তি হত ঘাসিলিং এর । বুকে কষ্ট
হত । কোনোদিন গান করেনি সে । গান টান মনে হত
সময় নষ্ট আর কান্না । দুর্বল মানুষ ; গলা দিয়ে
প্যানপ্যানে সব আওয়াজ বার করে বসে বসে- যাকে
অনেকে গান আখ্যা দেয় ! আর ক্লাসিক্যাল গান মানে
কতগুলো বুড়োবুড়ির বসে বসে, একগাদা ড্রাম নিয়ে
দাঁতমুখ খিঁচিয়ে কনস্ট্যান্ট গলা কাঁপানো । অনেকটা
বনের বাঁদরদের মতন ।

ঘাসিলিং এর জীবনদর্শন ভিন্ন । তাই তো সে পালোয়ান
। দেহই তার মন্দির-মসজিদ ।

কাজেই শিকার গেলো, এলো চোরশিকার, ড্রাম গেলো
এলো নৌকো । ওদিকে বাঁশ দিয়ে একধরণের নৌকো
তৈরি হত যা দেখতে কিছুটা বাটির মতন । ক্ষুদ্র ক্ষুদ্র
বাটি ! এই জনা চারেক সওয়ারি বসে ওতে, মাঝি
ছাড়া । সেই নৌকো নির্মাণের কাজ নিয়ে তীরে তরী
বাঁধলো ঘাসিলিং । স্রেফ ঐ মহিলা ফিল্মমেকারের
পাল্লায় পড়ে ! জলস্রোতে যখন টাট্কা নৌকোগুলি
ভাসতো তখন ভীনদেশী যুবতী হারপারের মনে হত যে
সিনেমার অশেষ ক্ষমতা । সিনেমা কেবল বিনোদন নয়
রূপালী এই ঢেউ মানুষের জীবন বদলে দিতে পারে ।
এক যন্ত্রমানবকে করে তুলতে পারে স্পর্শকাতর ।

বাউস্পারকে, সেন্সিটিভ এক মানুষ । যে একটি ঘাসপোকাও আর টিপে টিপে মারবে না । কোনো দিনই । ঘাসিলিং আজ ঘাস হয়ে গেছে । সতেজ ঘাস । তাই বুঝি ঘাসপোকাকার বেদনা সে বোধে । ঘাসজীবনের কথাকলি রচনা করে- এই শক্তিমানের অমল মন ।

ছায়াছবি শুধু স্বপ্নের জগৎ নয় । এইধারা, ছায়ামানুষকে রক্তমাংসের মানবে পরিণত করতে সক্ষম । সত্যি , হারপারের জীবনই তার প্রমাণ । অনেকটা আমাদের ছায়াপুরুষ সাধনার মতন । নিজ ছায়ার দিকে এক দৃষ্টিতে তাকিয়ে থাকে । ধীরে ধীরে সেইছায়ায় স্বচ্ছতা আসবে , রং আসবে, আসবে খ্রি -ডায়মেনশান । মনে হবে নিজেরই ক্লোনের সামনে আমি দাঁড়িয়ে আছি ! এই ক্লোনিং করতে সায়েন্স লাগেনা !

পাঠকের কী মনে হয় ? এখানে ঘাসিলিং এর চরিত্রে আর কী কী রং থাকতো ? কোন কোন জায়গায় তার রং চটে গেছে ? আমার মনে হয় পাঠকের নিজ কল্পনায়, ঘাসিলিং আরো জীবন্ত হবে । আরো সাবলীল । এমন কোনো ঘাসিলিং যার সঙ্গে কোনো কোনো পাঠক রিলেট করবেন । কাছের মানুষ বলা যাবে হয়ত । আমি পাঠকদের কাছে মিনতি করছি , ঘাসিলিং এর কথা আমাকেও একটু শোনান , কোন সুরে বাজছে তার বাঁশের বাঁশি ? পাঠকের অবচেতনে ?

যাকে পানাদার মা বলে লোকে সন্দেহ করতো সেই মহিলার নাম ছেল্লম্ । সে এক অদ্ভূত মহিলা । তার সারাদেহে কোথাও বিন্দুমাত্র সততা নেই ।

এক আজব খিচুড়ি রন্ধে এনে, তাও ফুটপাথে বসে বসে , ঘাসিলিংকে জোর করে রোজ খেতে দিতো । বলতো :: না খেলে আমি আত্মহত্যা করবো ।

সেই অখাদ্য খেয়ে খেয়ে ঘাসিলিং এর এখন তখন অবস্থা হত । কারণ ভোজন করার জন্য উপাদেয় তো নয়ই আর স্বাস্থ্যকরও নয় । অর্ধসেদ্ধ চাল ও ডালে মেলানো এক জগা-খিচুড়ি যার মধ্যে তেতো সবজি ও শক্ত আলু দেওয়া । কখনো তার সাথে আসতো বেগুনের বোঁটার সবজি । সেও অখাদ্য আর অর্ধপাক করা । ঘাসিলিং খেয়ে নিতো কেন, কেউ জানেনা হয়ত মনে রসের সঞ্চার হয়েছিলো এই কুরূপা নারীর জন্য । আভার মায়ের সাথে রোজই ঝগড়া হত শিকার নিয়ে । তখনই ছেল্লম্ স্টেজে নামে একেবারে অখাদ্য কুখাদ্য নিয়েই ! আসলে খুব ক্ষিদে পেলে তখন মনে হয় যে যা খাচ্ছি তাই অমৃত ! সেই লজিক হয়ত- ছেল্লম্ এর প্রতি টানের , ঘাসিলিং এর । তবে এই সম্পর্কই পানাদার সৃষ্টি করেছে কিনা সেই বিষয়ে লোকে

কানাঘুঘো করলেও একমাত্র ডিএনএ টেস্টই বলতে পারবে এই তথ্য ঠিক না বেঠিক ।

ঘাসিলিং এর বীর্যপাত, বনপথে- সে এক পাগলাঝোরার কিনারায় । সেই বীর্য নিয়ে তন্ত্রমন্ত্র করে তা থেকে পানাদার আবির্ভাব । এইসব গবেষণা আর বিজ্ঞানের বিষয় । সমাজের কাজ কুৎসা রটানো । আর আসল সত্য জানে কেবল ঘাসিলিং আর ছেল্লম্ ।

ঘাসিলিং তো পালোয়ান হওয়ার সময় থেকে প্রচুর কলা খেতে অভ্যস্ত কাজেই ছেল্লম্ তাকে অনেক কলা পেড়ে এনে খাওয়াতো । ছেল্লম্ আবার ওদের এলাকার পুরুষদের সাথে, পয়সার বিনিময়ে শুয়ে পড়তো তবে একে কেউ বেশ্যাবৃত্তি বলেনা । যেসব পুরুষ একা, তারা ছেল্লমের মতন নারীকে ভাড়া নিয়ে কয়েকঘন্টা শুতে পারে তবে সাথে লোক থাকে । নারীটি কেবল পুরুষের মাথায় হাত বুলিয়ে তাকে ঘুম পাড়িয়ে দিতে অভ্যস্ত । একে ওরা বলে সুইয়াল্ । ছেল্লম্ এই সুইয়াল্ এর কাজ করে অর্থ সংগ্রহ করতো আর দিনের বেলায় বনে জঙ্গলে ঘুরে, পক্ষীশাবক খুঁজে নিয়ে তাকে বড় করে জ্যোতিষ করতো । একটা খাঁচা বানিয়ে সেখানে বুনো পাখি ভরে ভাগ্য বলতো । পাখিটি এসে দানা খুঁটে খেতে খেতে একটি বিশেষ দানায় মুখ

দিলেই সৌভাগ্য আর নাহলে দূর্ভাগ্য এইভাবে কপাল
পড়া হত । লোকে, নিতান্তই মূর্খ নাহলে বুঝতো যে
এগুলি লোকঠকানো ভাগ্যগণনা । তবুও কিছুটা
দয়াতেই তারা ছেল্লম্কে পয়সা দিয়ে যেতো ।

--আহা রে , গরীব মেয়েমানুষ ।

ছেল্লম্ কে দুটি প্রশ্ন করলে একটির জবাব দিতো ।

আর অনর্গল মিথ্যে কথা বলতে পারতো ।

পানাদা তারই গর্ভজাত সন্তান কিনা জানতে চাইলে
কাউকে বলতো হ্যাঁ , কেউ শুনতো না আবার কেউ
জানতো যে হতেও পারে ।

পানাদা হাতির পদপিষ্ট হবার পরই ছেল্লম্ ওর পোষা
পাখিগুলিকে উড়িয়ে দেয় । ভাগ্যগণনা বন্ধই করে দেয়
একেবারে । শুধু সুইয়াল্ কাজের মাধ্যমে নিজের জীবন
চালিয়ে যেতে থাকে । লোকের মাথায় হাত বোলানো ।
অর্থের বিনিময়ে । আসলে সবারই কাছের মানুষ
হারিয়ে গেছে । তাই গায়ে মাথায় হাত বুলাবার কেউ
নেই । আজকাল সেটাও পয়সা দিয়ে কিনতে হচ্ছে ।

তাতে সুবিধে হচ্ছে ছেল্লমের মতন মহিলাদের । অর্ধ
মানবী হয়ে কাজ করছে তারা ।

ঘাসিলিং আর ছেল্লম্ কোনোদিনই বিবাহ করেনি ।
আসলে ওরা একে অপরের প্রেমাস্পদ ছিলো কিনা
তাও কেউ জানেনা । ওরা একজন অন্যজনকে খেতে
দিতো, সাহায্য করতো ইত্যাদি ।

সেই সম্পর্কের গোড়ার কথা কেউ জানেনা ।

আর পানাদা মারা যাবার পর ছেল্লম্ খুব কান্নাকাটি
করতো । পাখিদের উড়িয়ে দেয় মুক্ত আকাশে ।

জীবনটা একেবারে ভিন্নপথে চালিত করে ।

মিথ্যে কথা নাকি একেবারেই বলতো না । অতিরিক্ত
সত্যের বোঝা বইতে বইতে মাথা খারাপও হয়ে যায়
কিঞ্চিৎ । শেষদিন অবধি অবশ্য ঘাসিলিং সঙ্গেই ছিলো
। ছায়ার মতন ।

আভা চো-র বাবা ঘাসিলিং এর এইরকম জীবন ছিলো
ঠিক । জীবনের বন্ধল ছিলো সতেজ আর মজবুত ।

শেষ সময়ে স্বীকার করে গেছে যে পানাদা ওরই সন্তান
। আর তার মা ছেল্লম্ নয় । হারপার তার আসল মা ।
কিন্তু শিশু অবস্থায় হাতি নয়, মানুষ করেছে ছেল্লম্-ই

। পরে আভা চোয়ের মা । হারপারের ফিল্ম করার সময় নয় আরো বহু আগে ওদের ঘনিষ্ঠতা হয় । হারপার তখন ছাত্রী । বিশ্ব ঘুরতে বেরিয়েছে । ওকে আকৃষ্ট করে ঘাসিলিং এর সাহস, পৌরুষ, ম্যাচো স্বভাব । হারপারের মনে হয় এমন একজনের সঙ্গে পাওয়া লাকের ব্যাপারে । আর অনেক সাদা মেয়েই যা করে তাই করেছে হারপার । প্রেমিকের শয্যা নিয়মিত ভাগ করেছে । গর্ভপাত করাতে উদ্যত হলে ঘাসিলিং বাচ্চাটাকে রাখতে বলে আর জন্মবার সাথে সাথে ছেল্লম্কে দিয়ে আসে । গল্প বা সত্য এইটুকুই ।

আভা চো তো এখন মৃত । খুন হয়েছে হঠাৎ !

তাকে কবর দেওয়া হবে । পোড়ানো হবেনা । কারণ তার মন পোড়ে আগুনের লেলিহান শিখায় । দেহ পোড়েনা । কিন্তু কে ওকে খুন করলো ? কোনো পুরনো , লুকানো শত্রু ? ওর বাবা, মা কিংবা পতিদেবের ?

গুলমোহর গাছ রূপী গুলনার খুব হেসে ওঠে । তারপর বলে :: আধুনিকা , ধরতে পারলে না তো ?

ওকে খুন করেছে ওর একাকীত্ব ! লোনলিনেস্ ।

তোমাদের স্বার্থপর, ভোগবাদের সমাজের বিষুক্ত মানুষ
। যারা ওর জীবনে লোনলিনেস্ নিয়ে এসেছে ।

ও কেন পরিবার ত্যাগ করে এসেছিলো জানো ? কারণ
ওখানে সবাই পুতুল । কেউ মানুষ নয় !

ওরা অভিজাত্যের দাস , ধনসম্পদের নেশায় উন্মাদ ।
ওদের আবেগ নেই । লজ্জা নেই । ওরা কাঁদেও না ।
পাছে মেক আপ চটে যায় !

আমি দেখলাম যে আভার মৃত শরীর থেকে উঠে এলো
আরেক আভা ! সে তার স্বপ্নের আভা । নিজেকে সে
যে আকারে দেখতে চেয়েছিলো । এই ঘৃণ্য জীবন তো
সে চায়নি ! কেউই বা চায় ? ঘৃণা আষ্টেপৃটে ধরে ।

আভার দিদিমা নিজের চুল বিক্রি করে খেতো । পায়ের
পাতা পর্যন্ত লম্বা চুল ছিলো তার । সেই চুল দিয়ে
পরচুলো হতো । তারপর ওর মা গেলো চুরুটে ।
ওখানে মেয়েরাও হইস্কি পান করে , ভাত পচানো মদ
খায় আর চুরুট ও সিগারেট খায় । দিদিমা আর মা
দুজনেই খুব চুরুট খেতো । মদ খেতো । মা শেষদিকে
একদম খাবার খেতো না , চিন্তায় । খালি স্মোক
করতো ।

আভা ওর মাকে **লোটাস্ উইভার** হিসেবে দেখতে চায় ।
পদ্মফুলের ডাঁটির ভেতরে যে সুতো থাকে তাকে টেনে
বার করে কাপড় বোনা হয় ওদের দেশে । সেই ব্যবসায়
ওর মা **মাইক্রো ফাইনান্স** নিলে ওর ভালো লাগতো ।
ও দেখছে ওর মা লোটাস্ উইভার হিসেবে কাজ করছে
। ওদের ভাইবোনেদের ক্রীতদাস হতে হয়নি কারণ
মায়ের ব্যবসা একদম জমজমাট !

ওদের দেশে লোকে মুখে রং মেখে ঘোরে । আমরা
যেমন পাওডার লাগাই সেরকম করে ওরা দুই গালে ,
কপালে আর খুতনিতে রং মাখে । তবে ওদের রং
কিন্তু কেমিক্যাল নয় । গাছের ছাল, ফুলে পাপড়ি আর
বিভিন্ন ফলের সমাহার ঐ ভেবজ রং । এগুলি চামড়ার
জন্য খুব ভালো । দেখতেও ভালোলাগে । এক একটি
রং এক এক রকমের এনার্জি দেয় । লাল মানে তেজ,
সবুজ হল শান্তি, হলুদ মানে বন্ধুত্ব আর সাদা মানে
নির্মল মন । তবে কালো কেউ লাগায় না । ওটা অশুভ
। কিন্তু ওদের ওখানে নাকি কালো বিড়াল শুভ ।

আভা দেখছে যে ওর কাঙ্ক্ষিত আভা নাম্নী নারী মুখে
নানান রং মেখে পথে ভাসছে । এই আভা কাপড়ের
পুতুল বানায় । ওদের দেশে কটেজ ইন্ডাস্ট্রির খুব চল
। বিশেষ করে উইভিং আর ক্রাফ্ট । ওরা সবাই প্রায়
ভাঙা ভাঙা ইংলিশে কথা বলতে পারে এত বিদেশি

আসে ওখানে । কাজেই আভার দেহ থেকে সোনালী
আভা বার হচ্ছে । ও পুতুল বানায় । হরেক রকমের
কাপড়ের পুতুল । সেই কাপড় বোনে ওর মা ---!
লোটার্স উইভিং । ওর ভাইবোনেরা সবাই ওদের
ব্যবসায় সাহায্য করে । ওদের এত বড় ব্যবসা হয়েছে
যে ওরা এখন মাইক্রো ফাইন্যান্স এ ভাগ নেয় । লোন
দেয় নতুন ব্যবসাদার ও ছোট ব্যবসায়ীদের ।

ওরা কেউ প্রাণঘাতী চুরটের সাথে যুক্ত নয় ।

আর মুখে রং মেখে বার হলে কালার থেরাপিও হয় ।
নয়নের আরাম হয় , মন ঠান্ডা হয় । ওরা সবাই মুখে
রং চং মেখে হাঁটছে , জনমানবহীন রাজপথে ।

ওর বাবা শিকার করেনা । ওর বাবা এখন দেখা যাচ্ছে
ওদের গ্রাম সাফের কাজে নিযুক্ত । ওদের গ্রামে কেউ
ময়লা ফেলে পথঘাট নোংরা করছে না আর । সবাই
মার বাডু মার করে ময়লা তুলে নিচ্ছে । ওর বাবা সেই
সংগ্রামের নেতা । ওরা বাউন্সারের কাজ করলেও ওর
বাবা সাফাইকর্মী হয়ে আছে । শুকনো, ঝরাপাতা,
কাঠকুটো যাচ্ছে সারে আর ভাতের ফ্যান , অভুক্ত
খাদ্য বা সবজি পথপাশ থেকে চলে যাচ্ছে কোনো
ক্ষুধার্ত পশুর খাদ্য গহুরে ।

ওর বাবা সমাজ গড়ছে এখন , ভাঙছে না ।

আর আভার স্বামী একজন অধ্যাপক । যিনি ওদের গ্রামে ঐ সাফাই প্রথা চালু করেছেন । ওটাকে বড় আকার দেয় ওর বাবা , বাবা বড় কিছু করবেই !

লোকটাকে সবাই পাগলা বলে । ক্ষ্যাপা ধরণের । রাস্তা থেকে ময়লা তুলে তুলে নিয়ে যেতো । এমন সাফ করার বাসনা । হাইট বেশ কম । চোখে পুরু চশমা । আধময়লা পোশাক আশাক । লোকটা খালি ডোনেট করে আর মানুষের উপকার করে । নিজের জন্য কোনোদিন কিছু করেনি । আভা ওর গলায় বরমাল্য দিচ্ছে । বিষ ব্যবসাদারের গলায় নয় !

সবাই ওকে ক্ষ্যাপাচ্ছে :: ওরে শেষপর্যন্ত এক পাগলাকে বিয়ে করলি ?

শুনে শুনেও আভা হাসছে । খুব হাসছে । মনে মনে বলছে :: সবাই তো পাগল ! কেউ বেশি পাগল কেউ কম পাগল । কোনো পাগল চেনে বাঁধা থাকে আর কেউবা ঘুরে বেড়ায় , হেথায় সেথায় ।

আর কি ? আর হারপারে গর্ভজাত ওর ছোট্ট ভাই পানাদা, পরিত্যক্ত শিশু নয় ! আধুনিক যুগে ওকে গর্ভ থেকে গর্ভে ট্রান্সফার করা হয়েছে । ফ্রম হারপার, টু ছেল্লম্ এর গর্ভে ট্রান্সফার । ক্রম সংযোজন !

আভার ; কল্পিত আভার ছটায় নিজেকে দেখার চেষ্টা
করছি !

আমার আভাটা , গার্গীটা কেমন হবে ? গার্গী ছায়া --
গার্গীর প্রতিবিশ্ব ??

প্রস্থারা বুঝি সৃষ্টির মায়াম্পর্শে একসময় নিজেরাই চরিত্র
হয়ে যায় , তাই না ?



THE END